

En gemüdelken Avend

VAN ELKE RENKEN UT
MARX

In en Ferienhuus an d' Oostsee wull Lena sük dat in d' Baadwann gemüdelk maken. Na en mallen Dag mit vööl Regen weren hör Mann Michael, oder Micha as se hüm nöömde, mit hör Kinner Finn un Jan in 't Kino gahn. Lena maakde sük en Baad torecht un steeg in d' Wann. Wat weer dat mooi in dat heet Water mit vööl Schuum.

De Regen klöterde an d' Fensterschiev, un Lena lehnede sük entspannt torügg. To maal seeg se en swarten Fleck an d' Böhn. Se weer so fell ut d' Baadwann rut, daar kunn nüms tegen kieken. Aver wenn en so bang för Spinnen weer as Lena, weer dat woll normaal. Se greep sük hör Baadmantel van d' Haak un rönnde in d' Stuuw.

Up de Schreck wull Lena nu eerst maal en Glas Wien drinken. Üm de Spinn sull Micha sük kümmern, wenn de drie wedder daar weren. In d' Baadkamer gung se nich wedder rin. De Buddel Roodwien, de Lena nu van d' Stuvendisk nohm, harren Micha un se egentlik tosamen drinken



ELKE RENKEN

wullt. Aver se wull ja ok nich de hele Buddel losmaken. Lena haalde sük en Wienglas ut 't Stuvenschapp un söchde denn na en Körkentrecker. Se keek in all Schuuvladen in 't Ferienhuus to, aver nargends weer een to finnen. Denn even nich. Lena

haalde sük en Waterbuddel ut d' Köhlschapp un maakde sük dat Wienglas daarmit full. Denn even Gooswien. Nu besloot Lena, de Kiekkasten antomaken.

Se wuss, dat „Dirty Dancing“ keem. De Film harr se woll al achtmaal sehn, aver dat maakde nix. De keek se sük ok gern noch dat negende Maal an. Se leggede sük ünner en Deken up 't Sofa un drückde up de Feernbedenen. Nix röhrde sük. Lena keek na de Steekdöös.

De Steker weer daar in. Aver dat Lucht an de Kiekkasten brennde nich. Tomaal full hör in, dat de Kiekkasten en Avend vörher ok al nich recht wullt harr. Nu weer hör Luun so langsam heel in d' Keller. Weer se doch blot mit in 't Kino gahn. Denn harr se seker en Avend hatt, de gemüdelker ween weer mit Film, Popcorn un Cola.